

Tico Croes ta puntra kico partnernan economico ta pensa di Aruba

Promer Ministro a lubida Arubianonan na Medio Oriente

Negociacion Coastal y Irak por pone seguridad di Aruba na peligro

ORANJESTAD(AAN)--
E declaracionnan di Promer Ministro entorno e relacion entre Coastal y Irak a conduci na un comunicado di parti di Tico Croes di AVP, cu entre otro a recorda cu tin Arubianonan tambe na Medio Oriente.

Tico Croes a muestra cu falta a penas cinco dia pa e fecha fatal di 15 di Januari y ainda Gobierno ta crea duda na ki banda e ta para. Hustificando un eventual negociacion di Coastal cu Irak door di bisa cu otro companianan ta hacie, ta significa cu e Promer Ministro ta bay contra interes di Aruba y contra interes di mundo.

Ademas, manera e miembro di AVP ta sigui bisa, e Promer Ministro ta demostra un falta di conocimiento y seriedad pa un

asunto asina grave. E ta muestra cu e Promer Ministro no mester lubida cu hasta tin Arubiano estaciona na Saudi Arabia y cu den un eventual guerra nan lo por perde nan bida.

Tur compania cu ta negociando cu Irak ta cometiendo un atropello contra comunidad internacional y esun aki na Aruba, cu ta papiando cu Irak, ta comete un atropello contra seguridad di Aruba y no por tin e interes di Aruba na pecho.

Tico Croes ta muestra cu un Ministro Presidente di e pais Aruba mester por sa esaki. Falta cinco dia y ainda Gobierno no a informa Pueblo kico ta spera Pueblo y ki pasonan Gobierno lo bay tuma pa alivia Pueblo di e efectonan di un eventual flagelo

den Golfo Persico.

Ta increible, pero ta te Diabierna awor, cuatro dia promer cu e fecha fatal, Gobierno lo reuni cu un comision cu Gobierno a institui for di September aña pasa y lagando asina Pueblo den inseguridad y expectativa.

Tico Croes ta finaliza puntrando kico partnernan economico y politico den Latino America, Norte America y Europa lo pensa di Aruba awor cu contrario cu nan, Ministro presidente a crea e impresion di duda den loke ta socede na Medio Oriente. E ta conclui cu e pregunta, kico Arubianonan, bringando na banda di mundo contra Irak lo pensa di un declaracion ambivalente di Promer Ministro Oduber.